

आकासवाणी रायपुर

छत्तीसगढ़ी समाचार बुलेटिन

परमुख समाचार –

1– मुख्यमंत्री विष्णुदेव साय ह आज रईपुर म मुख्यमंत्री बिजली बिल भुगतान समाधान योजना के करीन सुभारंभ ।

2– राज्य विधानसभा म आज गैस सिलेंडर के किल्लत के मुद्दा गूंजीस

अउ

3– प्रधानमंत्री नरेन्द्र मोदी काली गुवाहाटी ले प्रधानमंत्री किसान सम्मान निधि योजना के बाईसवां किस्त करहीं जारी ।

मुख्यमंत्री बिजली बिल भुगतान–समाधान योजना

मुख्यमंत्री विष्णुदेव साय ह आज रईपुर म मुख्यमंत्री बिजली बिल भुगतान समाधान योजना के सुभारंभ करीन । ओमन बतइन कि ए योजना ले करीबन अट्ठाईस लाख बयालीस हजार बिजली उपभोक्ता मन ल लाभ मिलही । उहें, करीबन एक हजार पांच सौ छियासठ करोड़ रूपिया के बकाया प्रकरण के समाधान होही । एखर संगेसंग उपभोक्ता मन ल लगभग सात सौ संतावन करोड़ रूपिया के राहत मिलही ।

रसोई गैस—आपूर्ति निर्देश

भारत म रसोई गैस एलपीजी के घरेलू उत्पादन म करीबन पच्चीस प्रतिशत के बढ़वार होय हे। ए बढ़वार सरकार कोती ले घरेलू उपभोक्ता मन बर आपूर्ति बढ़ाए खातिर ले गे निर्णय के बाद होइस हे।

भारत पेट्रोलियम निगम लिमिटेड—बी.पी.सी.एल. ह लोगन ल आस्वस्त करीन हे कि सरकार एलपीजी आयात ल सुचारू रूप से सुनिश्चित करे बर हरसंभव परयास करत हे।

विधानसभा—बर्हिगमन

राज्य विधानसभा म आज शून्यकाल म नेता प्रतिपक्ष डॉक्टर चरणदास महंत ह स्थगन प्रस्ताव ले गैस सिलेंडर के किल्लत के मुद्दा उठाइन। ओमन किहीन कि गैस सिलेंडर के आपूर्ति म कमी के सेती लोगन हलाकान हवय। ऐमा भाजपा विधायक अजय चंद्राकर ह आपत्ति जतइन। पूर्व मुख्यमंत्री भूपेश बघेल ह किहीन कि ए बिसय केन्द्र के जरूर हे, फेर व्यवस्था राज्य ले होथे। श्री बघेल ह सिलेंडर के जमाखोरी के मुद्दा उठात ऐमा चरचा कराए के मांग करीन। ओमन किहीन कि कमर्सियल गैस सिलेंडर के सप्लाई बंद हे, जेखर ले होटल बंद होवत हे। एखर बाद विपक्षी सदस्य मन कोती ले करे गे शोर—शराबा के सेती सदन के कार्रवाई पांच मिनट बर स्थगित कर दे गीस।

कार्रवाई फेर ले सुरू होय म विपक्षी सदस्य नाराबोजी करत गर्भगृह म पहुंच गे, जेखर के विधानसभा के नियम के मुताबिक ओमन खुदे निलंबित होगे। सभापति ह विपक्ष के स्थगन प्रस्ताव ल अस्वीकार कर दीस। उन्हें, आसंदी ह किहीन कि ए केन्द्र के बिसय हरय, एखर सेती ऐमा चरचा नई करे जा सकय। एखर ले नाराज विपक्षी सदस्य मन ह नाराबाजी करत सदन ले बर्हिगमन कर दीन।

नगरीय निकाय—त्रिस्तरीय पंचायत चुनाव

छत्तीसगढ़ राज्य निर्वाचन आयोग ह नगर पालिका अउ त्रिस्तरीय पंचायत के आम अउ उपचुनाव बर निर्वाचक नामावली तियार करे के कारीकरम जारी कर देहे। कारीकरम के मुताबिक स्थानीय निकाय के

निर्वाचक नामावली अवइया एक अप्रैल के स्थिति के आधार म तियार करे जाही, जउन मतदाता मनक नाव संबंधित स्थानीय निकाय के क्षेत्र, वार्ड या पंचायत ले जुड़े भारत निर्वाचन आयोग के मतदाता सूची म दरज होही, उहीं मतदाता स्थानीय निकाय के निर्वाचक नामावली म नाव दरज कराए बर पात्र होही। आयोग कोती ले जारी कारीकरम के मुताबिक दावा-आपत्ति के निराकरण के आखिरी तारीख तेईस अप्रैल तक करे गेहे। निर्वाचन नामावली के आखिरी प्रकासन पांच मई के होही।

खबर के मुताबिक नगरीय निकाय उपचुनाव म नगर पालिका परिषद – सारंगढ़ और शिवपुर चरचा म अध्यक्ष के दू अउ पार्षद के पंद्रह पद खाली हे। एखर संगेसंग नगर पंचायत घुमका, बम्हनीडीह, शिवनंदनपुर अउ पलारी म अध्यक्ष के चार पद के संगेसंग पार्षद के साठ पद खाली हे। अइसने त्रिस्तरीय पंचायत म जनपद पंचायत सदस्य के आठ, सरपंच के अठहत्तर अउ पंच के एक हजार छप्पन पद खाली हावय। ए किसम ले प्रदेस के तैंतीस जिला म कुल एक हजार एक सौ बयालीस खाली पद बर चुनाव होना हे।

किसान सम्मान निधि-राशि

प्रधानमंत्री नरेन्द्र मोदी काली तेरह मार्च के असम के गुवाहाटी ले प्रधानमंत्री किसान सम्मान निधि योजना के बाईसवां किस्त जारी करहीं। केंद्रीय कृषि मंत्री शिवराज सिंह चौहान ह आज नई दिल्ली म संवाददाता मनले गोठबात करत किहीन कि प्रधानमंत्री श्री मोदी प्रत्यक्ष लाभ अंतरण ले करीबन नौ करोड़ बत्तीस लाख किसान मनके बैंक खाता म अट्टारह हजार छह सौ चालीस करोड़ रुपिया अंतरित करही। श्री चौहान ह किहीन कि सरकार ह किसान मन बर एआई आधारित डिजिटल प्लेटफॉर्म, भारत विस्तार के पहिली चरण के सुभारंभ करीन हे। ए किसान मन ल किसानी ले जुड़े प्रश्न के संबंध में पूरा जानकारी दिहीं। ऐमा किसान मन उंखर अपन भाषा म फोन कॉल के जानकारी दे जाही।

प्रधानमंत्री किसान सम्मान निधि योजना म छत्तीसगढ़ के चौबीस लाख इकहत्तर हजार ले जादा किसान मनके खाता म घलो चार सौ अंठानवे करोड़ तिरासी लाख रुपिया के रकम अंतरित करे जाही। ए दिन ल प्रदेस के सब्बों जिला म पीएम किसान उत्सव दिवस के रूप म मनाए जाही। पीएम किसान उत्सव म प्रदेस के आने-आने ग्राम पंचायत मन म किसान बइठका राखे के संगेसंग प्रधानमंत्री के कारीकरम के सोज्जे प्रसारण करे जाही।

आदि परब

नवा रङ्पुर के आदिम जाति अनुसंधान अउ प्रसिक्षण संस्थान परिसर म काली तेरह मार्च ले “परंपरा से पहचान तक” के थीम म “आदि परब” के आयोजन करे जाही। दू दिवसीय ए कारीकरम म छत्तीसगढ़ समेत मध्यप्रदेस, तेलंगाना, ओडिसा, महाराष्ट्र अउ झारखंड के जनजातीय कलाकार संघरही। कारीकरम म राज्य के चिन्हारी करे गे तैंतालीस जनजातीय अउ उप जाति के संस्कृति, परिधान अउ चित्रकला ल देखाए जाही। ए कारीकरम केंद्रीय जनजातीय कार्य मंत्रालय के मदद ले होही। छत्तीसगढ़ के जनजातीय संस्कृति, कला अउ परंपरा ल राष्ट्रीय मंच दे खातिर आदिम परब के आयोजन करे जात हे। कारीकरम के दउरान यूपीएससी के परीक्षा म चुने गे अनुसूचित जनजाति वरग के उम्मीदवार डायमंड सिंह ध्रुव अउ अंकित साकनी के सम्मान

अफीम खेती

बलरामपुर जिला के कुसमी थाना क्षेत्र के गांव त्रिपुरी-घोसराडांड म अवैध रूप ले करे जात अफीम के खेती के मामला म अभी तक सात झिन आरोपी मन ले गिरफ्तार करे गेहे। जम्मों आरोपी मन उपर एनडीपीएस एक्ट म मामला दरज करके कार्रवाई करे जात हे।

खबर के मुताबिक पुलिस ह करीबन चार हजार तीन सौ पैंतालीस किलो अफीम जब्त करे हे। जेखर कीमत चार करोड़ पचहत्तर लाख रूपिया बताए गेहे।

तीजन बाई-स्वास्थ्य

पद्मश्री, पद्मभूषण और पद्म विभूषण ले सम्मानित प्रसिद्ध पंडवानी गायिका तीजन बाई के तबीयत बिगड़ गेहे, जेखर बाद ओमन ल रईप ुर के एम्स म भर्ती कराए गेहे। ओमन न्यूरो सर्जरी वार्ड के आईसीयू म राखे गेहे, जिहां डाक्टर मनके देखरेख म उंखर इलाज होवत हे।

जानकारी के मुताबिक सत्तर बछर के तीजन बाई पाछू दू बछर के लकवा के बीमारी ले पीड़ित हे। अभी डाक्टर मन उंखर स्थिति म सरलग नजर राखे हे।

दुर्घटना

नारायणपुर जिला म होय एक रद्दा दुर्घटना म तीन झिन के मउत होगे। उहें, पच्चीस ले जादा झिन घायल होगे हे। ए दुर्घटना नारायणपुर-ओरछा मुख्य मार्ग म झारा घाटीगांव के तीर होइस, जिहां एक गाड़ी अनते-तनते होके पलटगे। बताए जात हे कि ए गाड़ी म तीस ले जादा झिन बइठे रिहीस। रद्दा दुर्घटना म दू झिन माइलोगिन समेत तीन झिन के मउकाच म मउत होगे। उहें, घायल मन ल नारायणपुर के जिला अस्पताल म भर्ती कराए गेहे। पुलिस मामला के जांच करत हे।

मौसम

बंगाल के खाड़ी ले आवत नमी के सेति प्रदेश के मौसम म अवइया दू-तीन दिन के दउरान फेरबदल होय के संभावना हे। मौसम विभाग के मुताबिक मध्य असर होही। मौसम विभाग ह काली बस्तर संभाग के कुछेक जिला म बरसा होय के संभावना जताय हे। उहें, चौदह मार्च के दक्षिण छत्तीसगढ़ म एक-दू जघा हल्का ले मध्यम बरसा होय या गरज-चमक संग छींटा बौछार हो सकत हे। एखर संगेसंग पंद्रह अउ सोलह तारीख के प्रदेश के सबो जिला के कुछेक जघा म बरसा होय के आसार हवय।

मौसम विभाग ह प्रदेश के अधिकतम तापमान म करीबन चार डिग्री सेल्सियस के गिरावट आय के बात केहे हे। उहें, कहूं-कहूं गरज चमक संग हवा गरेर संग गाज गिरे के आसंका हरय।

.....